





許太常歸田稿卷七目錄



衡陽尚

七言律詩

送盧比部守登州

黃山詩贈鄭國博

雪中柬友人

送許子愚還句容

秋日過元白留飲時芙蓉盛開元白有詩

次韻

董子元自海上來訪

留飲小堂次見懷韻

送沈生

送太常林公考績

座主楊師自涿州過句容省墓敬呈二首



人日淵甫宅賞燈 題王母瑤池圖壽郭

給事母 徐錦衣宅賞燈次孫

宗伯韻二首 新年初至小園戲作

因東所知 與王太守話舊

登雨花臺 孫宗伯以鱒魚惠老

毋敬賦一章致謝

首夏過俞園飲作 訪吳山人

夏日江右諸舉人集飲

伏日集司馬憲副宅次韻

寄李太常伯華 寄楊中丞以公

張通政寄避暑虎丘之作次韻

卧病 送胡編修入京

送方僉憲入蜀 江右諸舉人載酒過

訪席上賦詩申謝

方山壽詞 洲上小屋新成對酒

作 東郊田舍疊前韻

登方山絕頂 司馬憲副宅賞菊次

元白韻 徐茂才棄儒襲武詩



以壯之

奉陪王太宰登長干

寺塔

塔下陪太宰小飲

山中答友人

庚申元日

春日簡毛二舍次王吏部韻

題徐錦衣東園新樓

徐錦衣宅元夕燈會

喜晴

答李太常疊前韻

長干寺同年會時主人爲康宗伯錢司寇

林司空全太常四公

次林司空一首

謝孫宗伯再惠鱒魚

小樓初成有作

樓成石屋毛二舍携

酒過訪

送卓澂甫還杭州

梅令棄官爲母士林高之余因贈句

五月望日王太宰康宗伯錢司寇全太常

飲小樓有作

送沈國博判嘉興

送顧孝常赴大名別駕

贈蔡世卿座主鶴江學士公之孫也

中秋遇雨

送姚元白赴選



秋夜不寐

孟冬謁墓

趙叅政輓詞

司馬憲副宅賞菊次

吳山人韻

聞邢殿講碧山草堂

成詩以頌之

寄蔣中丞

咏牡丹次韻

贈道士

寄國戚文翁

贈文壽承學博

夏日徐將軍邀飲江上

寄李太常次見贈韻

李太僕輓詩用前韻

司馬憲副壽詞

壬戌元日

人日卧病用杜韻

歲首志感疊前韻

答陳淄川雪中見懷

答余伯祥雪中見懷

寄張龍岡工侍

答鳳墩

張巖亭輓詞

鍾山下與蔣徐二子

飲

春日偕蔣別駕曾博

士游永寧寺

王叅軍邀余偕張觀

察賞牡丹以病未赴



趙大舍偕諸友醖分見訪時三月望對月  
如畫  
送張都事陽翁閣老

之孫也  
初夏偶成次薛考功  
送吳山人北游

壽冶城兄  
阮僉憲新第成賦詩  
致賀阮久謝客末句嘲之

送呂沃洲侍郎赴召  
歸來吟二首答何解元仲平

對白髮有感  
懷高侍御

贈林醫  
送文休承

送阮考功擢辰沅兵憲  
游清涼寺  
登西塞山

八月十一日吳維安何仲平二殿元見過  
秋懷  
同年李康二尚書趙

中丞尹林孫三侍郎胡光祿胡通政八  
公秋日會於西園余以制不預康公有

詩見貽次韻  
送胡通政致政還成  
都  
至後諸鄉彥過訪



除夕次阮僉憲韻

迎春日貽穀堂小集

次伯祥韻

新年謝諸老見過

聽雪答顧孝符

雪中偶成

黃叅政入京見訪席上贈句

人日喜晴

寄胡中丞

聞賊

老馬

送宋鴻臚使西番

六十初度自述四首

用舊韻

康宗伯致政歸以閩

警且憇武林

山中次羅贊善韻

寄張月鹿次韻

金白嶼壽詩

十一月望日諸老載酒過訪奉謝一首

贈內

答董子元見懷用舊

韻

送李子達乞假還豐

城

送姚鳳麓守大名

肖泉公見過贈詩次韻

送陳守禮入京

寄郝寅老

寄蔣中丞東瀾兼懷郝老

送李斗岡守温州

東麓亭赴王太宰約



春日赴徐少東約 謝白石侍郎見訪

白石公以戎部諸詩見示奉謝一首

答皇甫百泉 次胡秋宇游牛首韻

春日王太宰潘少宰看花一首

送裴侍郎進表 楊水部枉駕道故席

上成詩 秋日寄朱山人

寄劉白石大叅 送謝仁峰吏部

送姚元白考績 初春游高座寺陪諸

善年丈 登雨花臺

是日候肖翁不至 題俞氏秀野園

澂父光祿得子佳詠見示次答

送盧比部

才子為郎名久著 一箇公如

才子為郎名久著 一箇公如

才子為郎名久著 一箇公如

才子為郎名久著 一箇公如

才子為郎名久著 一箇公如



送裴侍郎進表

揚水部在駕道故席

上成詩

秋日寄朱山人

寄劉白石六卷

送謝仁峰吏部

熈父光祿對子其精具示次答

座寺陪諸

晏日刻肖余不至

與命為委櫻園

許太常歸田稿卷七

世宗  
振錄  
西  
詩  
卷七

上元許穀仲貽著

七言律詩

送盧比部守登州

才子為郎名久著一麾今始向東牟  
渡江畫舫唯携鶴到郡黎民不佩牛  
問俗有時過不夜題詩特地上之  
罌漢家公輔徵循吏莫道熊韞隔  
鳳樓

黃山詩贈鄭郡博

職官



君家住在黃山下門口清流是玉溪盡日窮經  
翻竹素有時吹劍拂虹蜺谷蘭帶雨金莖長巖  
竹迎秋鳳尾齊一自出關爲博士白雲常護舊  
丹梯

雪中柬友人

風急山高雪片深饑鳥寒雀滿空林且欣書卷  
光能映獨恠梅花冷不禁擁被此時栖洛下放  
舟何日到山陰閉門定有陽春曲莫道寰中絕  
賞音

送許子愚還句容

南雍文采早知名共說飛騰是鳳翎百里望鄉  
雲樹近九秋分袂露華零埵笮夜榻應同被畝  
畝春鋤好帶經別後相思倘乘興不妨還過草  
玄亭

秋日過元白留飲時芙蓉盛開元白有詩

次韻

清池縹緲白鷗翔繞岸芙蓉總靚粧佳境偶來  
增野興清尊相對惜年芳里中結契存膠漆竹



裏將雛愛鳳皇欲謝塵踪陪雅躅風前休咲鬢  
滄浪

董子元自海上來訪留飲小堂次見懷韻  
駐馬俄驚問草堂分襟猶記上河梁閉門愧我  
塵容老握手憐君道氣長白雪才高元寡和綈  
袍義重獨難忘黃花節近須留醉未許飄然別  
建康

送沈生

佳士遙從故里歸一尊留坐釣魚磯囊中暫閱  
蒼龍劔溪上重尋翠竹扉文豹隱山從變化流  
螢臨卷借光輝少年夙有冲霄志不久青雲傍  
馬飛

送太常林公考績

舊京禮樂借才賢美政新成獻日邊去路旌麾  
衝朔雪入朝冠珮及春天北門接武朱輪盛南  
國留題錦字傳承寵卽看登鳳閣姓名元在聖  
人前

座主楊師自涿州過句容省墓敬呈二首



昆曰禾  
掄才尚想坐南宮一顧駑駘價卽隆貝錦紛紜  
冠早挂碧山迢遞信難通昔時文體遵歐老今  
日人心望謝公不是尋源過句曲肯騎羸馬到  
江東  
每依北斗望雲階常見文光接上台自分門墻  
無日到豈知旌旆自天來探竒太史真高致問  
字侯芭愧不才吳下故人思見面雪舟乘興未  
須回

人日淵甫宅賞燈

人日燒燈敞華堂美人邀客送金觴盤中膾出  
江魚羨雨後剪來春韭長好景翻疑宵是晝繫  
絃誰辨徵耶商青衣亦解留賓意五夜猶添寶  
鴨香

題王母瑤池圖壽郭給事母

共傳滇國綺筵開却望瑤池鶴馭來五色旂從  
青靄下千年果向玉盤堆錦堂慈母仙人相青  
瑣郎君柱石才晝日寧親逢此景鄉人爭道勝  
蓬萊



徐錦衣宅賞燈次孫宗伯韻二首

佳辰邀客敞虛堂  
水國仙花滿座傍  
遠近笙歌通邃宇  
高低燈火映迴塘  
名香繞席龍涎潤  
春酒浮杯竹葉光  
不是朱門饒樂事  
山河盟誓本來長

華燈萬朶接金堂  
綺席重張火市傍  
宿鳥驚人移別樹  
游魚聽曲出方塘  
王孫開閣留時令  
客子啣杯戀景光  
最是夜深歌不斷  
絃聲齊逐漏聲長

新年初至小園戲作因柬所知

偶過別墅暫停軒  
童子開門碧草繁  
自咲樊遲初學圃  
非關董子不窺園  
豈無鳥語喧松塢  
漸有桃花上竹垣  
二仲肯來須掃逕  
欲憑春色送芳尊

與王太守話舊

京兆堂中早盍簪  
宦游常是嘆離群  
名家節操何曾改  
塵世風波未可聞  
千里爲親遙上䟽  
百年懷舊重論文  
興來便欲從君去  
鴈蕩峰頭看



白雲

登雨花臺

高臺一望俯留京樓閣千重錦繡明  
鍾阜東來龍自繞澄江西映練同清  
三春雲物能牽興六代興亡易愴情  
借問風流江左客只今誰有謝安名

孫宗伯以鮭魚惠老母敬賦一章致謝

白下江鮭稱信羨若論丙穴只尋常  
瑤筐再見分南省珍惠重勞贈北堂  
不用取熊遵孟氏自知躍鯉愧王祥  
慈幃兩歲嘗新處推食高情夢未忘

首夏過俞園飲作

閑來結伴訪名園首夏清和灌木繁  
舉網得魚臨後沼開尊邀月坐前軒  
峰巒獨愛當堦起簫鼓何妨入夜喧  
見說主人容二仲從今花外駐雙轅

訪吳山人

兵戈何處是安居暫向都城結草廬  
閉戶揮毫



才轉健登樓長嘯意何如望鄉難道書無鴈彈  
鋏欣看食有魚終日賣文剛一醉知君非是愛  
羸餘

夏日江右諸舉人集飲

柴門車馬晝駢闐草閣冠裳喜接聯尚想論文  
過省郡豈知懷舊到林泉奎光燦爛搖蓬戶蕞  
菜荒涼上酒筵知己老來何所贈但將鍾鼎望  
諸賢

伏日集司馬憲副宅次韻

開尊花塢隔炎暉移席風臺見翠微高士遠來  
搖彩筆美人相對試荷衣庭空獨愛孤松秀林  
茂常看衆鳥歸借問紅塵車馬客何如此地數  
相依

寄李太常伯華

推轂同升憶往年東曹水鏡愧高賢看拋朱紱  
辭清禁聞向瑤臺訪列仙書記汗牛人不及文  
成倚馬世爭傳異才合置絲綸地會見徵書下  
九天



寄楊中丞以公

中丞爲國靖黔黎控節雲中訓士齊屢聽凱歌  
傳紫塞早看褒詔出金闈由來黠虜知名姓此  
去怕山息鼓輦近報絲綸催佐政豈徒威震鴈  
門西

張通政寄避暑虎丘之作次韻

伏日今年暑更饒端居無地避炎熇清流繞舍  
愁將涸赤霧蒸林苦不消望雨久瞻河伯駕賜  
冰今隔紫宸朝何當遠訪通玄客共坐風臺聽

玉簫

卧病

中年常苦病相仍一室周旋借紫藤牀上青囊  
看不厭望中丹壑興難乘未同玄晏栖安定莫  
比相如卧茂陵獨有端居能見性年來全類碧  
巖僧

送胡編修入京

畫游未許戀清溪載筆重看上鳳池日下趨朝  
逢舊侶柳邊歸院賦新詩離亭綠酒和風滿去



路牙檣淑景遲綸閣游登知有日料君猶是黑頭時

送方采山戶部擢四川僉憲

宦署詞壇並有名  
轡軒承寵賦西征  
九江暮雨揚帆去  
三峽秋風攬轡行  
問俗盡觀天府勝  
題詩長對雪山清  
亦知別後台衡近  
折柳偏傷此日情

江右諸舉人載酒過余草堂款叙入夜惇宿好也酒間輒成四韻申謝并致期望

云

十載重逢意轉親  
佳辰開宴就衡門  
山林謬享賓筵盛  
宇宙爭看友道存  
自昔抗言推賈傅  
至今曲學咲公孫  
諸君此去敷陳近  
暫對芳尊試一論

方山壽詞

天門同榜羨英豪  
未老懸車望益高  
直道豈能容柳下  
知人元自說山濤  
閉門著作追麟史  
指日飛騰有鳳毛  
異骨峻嶒占壽遠  
延齡何用覓



金桃

洲上小屋新成對酒作

黃蘆白葦遶汀洲小結茅廬也自幽樹色近從  
仙島出江光遙帶斷雲流沙邊亂集漁人網門  
外時停估客舟風景滿前杯在手百年天地復  
何求

東郊田舍壘前韻

平生懶性愛滄洲東郭誅茅近且幽門對鍾山  
蒼靄合橋通淮水碧波流晨過曲隴牽耕犢夕

傍澄潭理釣舟樗散本非清廟選玄纁知免漢  
廷求

登方山絕頂

天印山高四望遙振衣同上興飄蕭深巖藉草  
秋仍茂絕頂清池旱不消散睇青巒圍錦甸舉  
頭蒼靄接丹青洞中却愛栖真者不信人間有  
市朝

司馬憲副宅賞菊次元白韻

抱甕年來不出園爲看名菊過高門芳菲亂簇



民日報 卷七  
鮫人錦高下齊開玉女盆同學故人欣在野清  
秋佳色巧當軒留歡待月忘歸路陶令風流萬  
古存

徐茂才棄儒襲武詩以壯之

本是將門多猛氣竟辭泮水謁丹青向來藝苑  
曾吞鳥此去轅門好射鷗元帥敦詩推郤縠丈  
夫投筆羨班超封侯取相俱臣子只在輸忠翊  
聖朝

奉陪王太宰登長干寺塔

金輪寶鐸映瑤空九級森嚴壯佛宮仰視上方  
星緯近俯窺南國地圖雄聖皇繼統酬洪造哲  
匠揮斤奪化工此日振衣陪太宰乾坤高覽更  
誰同

塔下陪太宰小飲

季冬晴日照長干碧殿弘開習氣暄野客老來  
投淨土上卿公暇駐高軒旋烹山蕨供晨鉢更  
折江梅薦晚尊不是宰官耽說法暫尋真境向  
空門



山中答友人

早歲曾開萬卷餘，誤携三策上彤廬。  
歸來松菊荒猶在，過去勲名好是虛。  
盡日洞窓唯點易，經年政府不通書。  
故園丘壑堪投老，莫更龍鍾望後車。

庚申元旦

年光春色兩相新，百歲難逢是此辰。  
旭日巧隨元日轉，辛盤欣共菜盤陳。  
仰窺天上芳時正，俯視寰中喜氣均。  
多難不須論往事，今年豐稔樂倍

還人

春日簡毛二舍次王吏部韻

樓居寄在金陵市，相對柴門路不賒。  
自古乾坤皆逆旅，于今孔李是通家。  
莫看烽火悲鄉國，且向尊罍閱歲華。  
已辦青錢防酒債，春來同賞杜鵑花。

題徐錦衣東園新樓

名園舊在帝城東，肯構規模麗且雄。  
已闢長河通遠漢，更開傑閣送飛鴻。  
鍾山蒼翠浮簷際，鷺



嶺雲霞落鏡中  
弱水仙宮難可到  
若論此地得無同

徐錦衣宅元夕燈會

王孫愛客昔賢同  
元夕開筵甲第中  
堂上華燈欺朗月  
階前紅樹逼遙空  
霓裳屢舞看逾艷  
象管齊吹聽不窮  
莫道朱門非閬苑  
夜深真坐蓋珠宮

喜晴

却當積雨開晴色  
獨上高樓動好懷  
太皞欲教

呈淑景飛廉先為掃  
陰霾舊來燕子還  
穿幕新長苔痕半上  
堦春服已成幽意愜  
欲偕童冠浴秦淮

答李太常疊前韻

轉盼京華二十年  
龍門曾御李膺賢  
久知去國心元赤  
近說餐霞骨已仙  
濟世才高全未展  
懷人句好近方傳  
即今夢卜徵求急  
豈待吹噓始上天

長干寺同年會時主人為康宗伯錢司寇



林司空全太常四公

群公開宴向祇林偏許山人再盍簪接座久推  
援世手觀空聊寄出塵心芳菲落去憐春色縹  
緲飛來喜梵音話舊却思題鴈塔交情應共歲  
華深

次林司空

莫訝尋春此日遲追隨獨咲鬢如絲珠林鳥雀  
時還語碧殿壺觴晚更移八座久懸霖雨望一  
丘元共赤松期慈恩舊侶今重聚肯厭頻傾白

玉卮

謝孫宗伯再惠鮓魚

首夏江鮓玉作鱗南宮頻贈北堂親潘安竊幸  
娛慈侍子產何須付校人黃閣有情偏憶舊白  
頭無恙數嘗新由來錫類知醇孝豈獨輝光被  
隱淪

小樓初成有作

春來買地結樓居喜傍先人舊草廬欲比元規  
常看月難同弘正獨藏書簷前燕雀喧喧度檻



外雲霞片片舒最愛接天多灌木翠陰高映四  
窓虛

樓成石屋毛二舍携酒過訪

新築小樓聊息駕忽承仙客遂停驂雕盤近載  
瓊羞美銀甕遙分玉醴甘坐處薰風增爽氣望  
中靈阜擁烟嵐知君愛我清虛境從此梯雲好  
共談

送卓漱甫還杭州

近從壁水識英賢若比瓊枝更皎然戀別再過  
青草渡望鄉遙指白雲天行經南畝初嘗來島  
到西湖正採蓮為想波心看月處懷人應誦謝  
莊篇

梅令棄官為母士林高之余因贈句

百齡慈母臨官舍每指西山戀舊畿愛汝能將  
青綬解乘春遙奉彩輿歸囊中薄祿堪調膳身  
外浮名好息機變姓豈同梅福隱絕裾應咲太  
真非

五月望日王太宰康宗伯錢司寇全太常



飲小樓有作

結樓剛稱野人廬枉駕叨承貴客車  
書靜自來梁上燕時平初薦海中魚  
每懷聯珮年應久敢謂栖山樂有餘  
康濟幸逢公等在一枝從此是安居

職官

送沈國博判嘉興

典教久推韓博士能詩元是沈雲卿  
言辭壁水叅名郡獨泛仙槎別舊京  
政善定知先緩賦時清何用更談兵  
宦游且喜無鄉思一夜家書到

越城

送顧孝常赴大名別駕

禮院多年曳綵裾清風不愧老尚書  
天朝舊重河東郡綸命新陪刺史車  
五袴有歌真望汝三山無伴獨愁予  
由來此地遷喬易為喜賢聲近帝廬

贈蔡世卿座主鶴江學士公之孫也

訪舊勞君到浣花茅坐呼酒坐烟霞  
百年苦憶通家客八月欣停上漢槎  
丹穴產雛靈有種玉



堂繩武路非賒獨慚門下彈冠者潦倒空餘兩  
鬢華

中秋遇雨

秋節平分今夕好却嫌風雨暗穹蒼遂令良夜  
嬋娟色不照空庭翡翠觴似妬光明遮寶鏡可  
堪寂寞對胡牀亦知天上還分曉卷霧思登貝  
闕傍

送姚元白赴選

詞人五十氣崢嶸臂挂干將上玉京高適詩才

由此健孟郊宦業自今成彈冠即向層霄出衣  
錦須從故里行指日對君頭角變青袍誰道悞  
儒生

秋夜不寐

新開小閣對清秋莫比仙人十二樓自分潛藏  
同尺蠖肯將榮寵羨犧牛苑邊霜落蘼蕪老城  
上風高鼓角愁最是憂時眠不穩推窓中夜看  
旄頭

孟冬謁墓



玄冥改令凍雲新展墓常年用此辰五鼎敢云  
修祖祀孤豚曾不逮嚴親豈無龍虎環幽宅勝  
有詩書啓後人愧乏顯揚酬罔極每逢霜露倍  
沾巾

趙叅政輓詞

豸冠曾見侍承明五馬南行有頌聲辭寵特加  
藩伯號藏真高卧建康城燈前送酒金釵滿水  
上吹簫盡舫輕莫道風流隨電露他年江左定  
知名

司馬憲副宅賞菊次吳山人韻

細觀霜菊多佳品盡聚江東柱史園已引芳叢  
開曲徑更分異種列層軒招尋早屆玄冥節延  
賞須傾白獸樽爲許醉看還列炬豈愁深院易  
黃昏

聞邢殿講碧山草堂成詩以頌之

碧山縹緲臨天闕學士東歸結草堂爲厭長途  
聊息駕豈容清世遂焚章層樓疊起星辰近沃  
野平開黍稻香他日功成倘回首好從此地話



農桑

寄蔣中丞

吳門常記奉高談別後逢人謝錦函  
召伯向時留陝右孔明今日在滇南  
內臺出鎮名元重貴竹移家俗舊  
諳柔遠暫勞調鼎近獨愁無地盍  
朋簪

咏牡丹次韻

春來紅紫放花頻開到名花恰暮春  
玉輦對看曾帶咲蛾眉初見早生  
嗔清香疑自天邊落絕

艷翻從雨後新即使千葩同日吐敢於茲種闢  
精神

贈道士

蚤披內景愛玄虛遂向仙宮佩羽衣  
謁帝中宵升紫府課經清晝揜松扉  
洞邊蘓說清牛度鼎內今看絳雪飛  
花甲初周還更轉長生應是得真機

寄國戚文翁

戚里仙翁住日邊百齡將近髮猶玄  
朱門一別



心常往白鴈頻歸信未傳  
養老歲增光祿米入朝  
時賜鎬京筵八千自是靈椿壽况近天家雨露偏

贈文壽承學博

白下論交四十年舊時青鬢各華顛  
天邊結綬憐君晚谷口扶犁讓我先  
月夕偶成鷄黍會秋江暫駐孝廉舡  
薦雄此去多知己誰道儒官老鄭虔

夏日徐將軍邀飲江上

儒將端居驃騎營開筵邀我聽談兵  
江間雨過烟氛息闌外風來暑氣清  
玩世莊周成野叟封侯定遠是書生  
冰漿夏簟留歡處日暮猶喧鼓角聲

寄李太常次見贈韻

官階何必到三台文苑如君已是魁  
水上結樓龍偃卧院邊栽竹鳳飛來  
瑤窓對雪揮斑管瑤圃看花送綠醅  
甘載避名唯樂志竟忘身是濟川才



李太僕輓詩用前韻

春榜名高癸未年至今寰內仰才賢曾沾德政  
思何武每誦新詩比謫仙鵬鳥賦成人已去色  
絲碑在行堪傳遙知埋玉牛眠地精氣中宵射  
碧天

司馬憲副壽詞

習靜閒同野鶴栖草堂寄在飲虹西  
林間對酒花爲障臺畔看雲石作梯  
驄馬道倖以拋去久麒麟天上送來  
齊入山爲覓長生藥堪以得仙芝手

自携

壬戌元日

青陽應律灰初動素幔搖風氣早和  
堂背寂寥機杼在鏡中衰颯髣毛皤  
留京拜表燒銀燭上國趨朝響玉珂  
一自離群甘抱拙不將勲業恨蹉跎

人日卧病用杜韻

此日昔傳人共得今年愁向病中看  
但傾栢酒聊成醉縱着狐裘不禦寒  
案列異書閒自校匣



藏雄劔老羞彈獨憐寸草心空在每對春暉欲  
報難

歲首志感疊前韻

五十纔過今又九百年強半隙駒看烟霞不改  
鍾山好朋舊頻凋洛社寒楊子玄成從客笑貢  
生冠在向誰彈南山種豆嗟怕雨始信逢年自  
古難

答陳淄川雪中見懷

早逐雲程疋馬同老投烟壑萬緣空匡時顧我

元無策鍊氣聞君近有功雪後難乘王子興詩  
來堪繼郢人風新年可信逢迎懶一室周旋兩  
鬢蓬

答余伯祥雪中見懷

山中雪片春仍劇頗恠寒多阻向榮病客憂時  
頭轉白美人得句思偏清挂冠自愧非高士伐  
木遙知念友生稍待服成尋淑景舞雩壇畔好  
同行

寄張龍岡工侍



自離南極上天門朝野同瞻八座尊共道廟堂  
資柱石遂令江海隔寒温名留棘寺陰功遠書  
寄柴桑友道存岡畔神龍難久卧看飛甘澍洒  
乾坤

答鳳墩

新年仙客阻追從綺閣誰同白玉鍾想對遠山  
看霽雪定依芳樹愛和風久眠洛巷心偏寂欲  
訪山陰興未濃獨喜新篇時見贈每於花下數  
開封

張巖亭輓詞

早時文苑喜相求共說雷陳意氣投五夜並趨  
丹鳳闕十年同卧白蘋洲山中采藥勞分贈花  
下開尊許共游何事乘雲今不返臨風休恠涕  
難收

鍾山下與蔣徐二子飲

誰家結屋鍾山麓湖上春雲莽作堆高冢歲深  
麟偃卧小堂春到燕飛迴冠裳偶向花間遇尊  
酒俄從竹下開試聽居人談往事此中曾見翠



華來

春日偕蔣別駕曾博士游永寧寺

望裏春雲接上方興來同扣遠公房  
緋桃半向風前吐碧草都從雨後芳  
勝地遨遊逢舊侶浮生塵土愧空王  
移尊坐傍菩提樹轉愛東林慧日長

王叅軍邀余偕張觀察賞牡丹以病未赴  
煖雲遲日霽華新瑤圃開筵款上賓  
苒苒府高情勞宿約文園多病隔芳塵  
宮商競奏梁州曲紅紫爭披洛下春  
二美邀歡知與劇不妨獨少姓車人

趙大舍偕諸友醖分見訪時三月望對月  
如晝

翩翩佳士携尊至楚楚芳筵傍閣開  
花氣吐香天上落柳風吹煖坐間迴敢  
云好客先投轄獨喜論文數舉杯興劇  
莫愁西日墜東山早送夜珠來

送張都事陽翁閣老之孫也



相門佳嗣玉壺氷宦譽芬芳久著稱結綬昔辭  
三楚地奏功今上五雲層渥洼元報神駒出阿  
閣行看綵鳳騰自咲傳經門下士白頭空老舊  
金陵

初夏偶成次薛考功韻

少日彈冠非貢禹老來學圃似樊遲平生愛我  
無如酒凡事輸人不但棋一畝舊臨佳麗地四  
言新和考槃詩炎風朔雪年年轉來葛無心總  
不知

送吳山人北游

仙翁避地正相親眺遠其如別思頻炎月長途  
還策馬好山隨處定留人倘攀岱樹應懷古莫  
聽燕歌易愴神霄漢故知元不少歸囊何止贈  
詩新

壽冶城兄

常愛吾家老弟昆白頭相對轉相親兄誠蓬島  
之間客弟愧羲皇以上人野鶴長松容貌古草  
衣木食性情真閑身但願同傾酒再看昇平五



十春

阮僉憲新第成賦詩致賀阮久謝客未句

嘲之

樓居自昔比蓬萊  
閱閱新從旺地開  
廳廣豈同旋馬入  
門高應待駟車回  
未瞻雄旆緣多病  
欲賦翬飛愧不才  
借問東山叩閣者  
幾人曾見謝公來

送呂沃洲侍郎赴召

司空獨愛草堂雲  
公暇時來坐夕曛  
喜對仙姿

瞻有道欲酬玄論愧  
無聞麒麟散地知  
難繫鴻鴈清秋惜  
易分別去豈能忘  
仰止但從台斗看  
氤氳

歸來吟二首答何解元仲平

歸來猿鶴自相親  
五柳陰中晝掩門  
避地不妨身獨老  
談天何用舌長存  
居非箕穎人疑許  
友遇天台姓是孫  
蟬蛻汗泥元不染  
玄心將共赤

霄論

歸來賓客謝紛闐  
對面三峰黛色聯  
煮酒若非



敲澗石烹茶定是汲山泉愁談仗劍游京國漫  
說含香捧御筵今日獨披真隱傳始知雲卧是  
高賢

對白髮有感

初訝霜毛見幾莖豈知中歲滿頭生求仙反黑  
曾無術未老呼翁祇自驚回首居諸真不待傷  
心書劍兩無成所忻覽鏡朱顏好且對清尊說  
壯情

懷高侍御

江上分襟蘆荻秋別來經歲長離憂昔時夢寐  
空鷁列今日生涯各釣舟淮水獨吟霜樹老巫  
山遙望暮雲浮相思幸有娥眉月分得清光照  
石頭

贈林醫

經傳素問自軒皇肘後爭談抱朴方此道玄微  
難啓鑰看君神妙已升堂鼎中鍊藥功非淺指  
下回生技最良獨恠療予無異術恐因泉石在  
膏肓



送文休承

四紀論交獨有君，舊游回首一浮雲。  
草堂燈火杯重把，岐路冰霜歲欲分。  
三品揀金欣入貢，九方相馬看空群。  
昔時英俊知多少，不及文淵晚策勲。

送阮考功擢辰沅兵憲

山公清譽重南銓，金印新分節使權。  
坐對五溪驅號令，行看諸洞息烽烟。  
過家豸繡娛慈幄，去路鸞僚戀別筵。  
共道長才將大用，暫教旌旆駐

湘川

游清涼寺

古寺依山路不賒，道林行處寂無譁。  
臙脂久閉千年井，薜蘗常開四照花。  
近郭豈知藏窈窕，素心偏喜對袈裟。  
相逢莫話龍池劫，且傍香臺聽法華。

登西塞山

偶登西塞眺諸天，景物逢秋倍廓然。  
列岫疊呈圍錦甸，長江斜繞映芳筵。  
坐談全盛欣明世，追



民日報 卷七  
憶豪華愧昔賢最愛夕陽增逸興未能歸去更  
留連

八月十一日吳維安何仲平二殿元見過  
二妙逢秋問索居碧梧深處對瓊琚鳴琴在匣  
欣重奏藉草緣階笑未除但摘園蔬頻送酒爲  
看山月久停車亦知藻思將華國莫惜高言暫  
起予

秋懷

歸卧南山久閉廬西風又見洒樓居賦同宋玉

真悲矣家比揚雄只晏如天遠鴈行來朔漠夜  
涼蛩語傍階除燈前老眼欣無恙時檢殘編校  
魯魚

同年李康二尚書趙中丞尹林孫三侍郎  
胡光祿胡通政八公秋日會於西園予  
以制不預康公有詩見貽次韻

山人久卧白雲隈勝會遙傳秀句來仙侶暫從  
鵝鵲下錦筵新對鳳皇開芙蓉夾路迎朱紱簫  
管分行送玉杯多病獨憐同榜客不隨旌蓋習



池回

送胡通政致政還成都

栢府威名徹塞垣  
瑣闥封事動朝端  
入宮本忌蛾眉寵  
去國休歌蜀道難  
錦水繫舟機石穩  
青城燒藥洞天寬  
暫還終爲蒼生起  
誰道東山老謝安

至後諸鄉彥過訪

經年無客問藤蘿  
結駟同來喜若何  
小閣盤飧非鼎味  
仲冬風日似陽和  
觀梅莫恠舒紅早  
看

竹應憐聳翠多  
入夜留尊談往事  
駒陰真向隙中過

除日次阮僉憲韻

除日重逢感慨多  
人情遷轉一江河  
才微莫恠勲名淺  
老至其如鬢髮皤  
獨坐空亭稀問字  
久栖窮巷斷鳴珂  
清虛似得長生術  
休問唐生壽幾何

迎春日貽穀堂小集次伯祥韻

纔聽東郊鼓吹頻  
和風已是向人親  
山中幸集



龍門客閣上同傾竹葉春信有綈袍重道故豈  
無綵勝共迎新不妨歸轡沾踈雨詎肯停杯負  
此辰

新年謝諸老見過

旌蓋衝寒訪釣臺新年蓬戶爲公開山林舊卧  
逃名叟廊廟今瞻濟世才野簪豈嫌呈二簋客  
星還許近三台谷中得聽調元論不待吹葭暖  
自回

聽雪答顧孝符

長空向晚結彤雲急雪隨風入夜聞密洒窓前  
偏淅瀝亂飄庭外定紛紜來當窮臘寒逾壯坐  
徹嚴更火尚溫寄語楊朱休下淚明朝岐路恐  
難分

雪中偶成

片片飛花下太虛蚤時積素滿庭除興來王子  
思移棹老去孫公嬾讀書共道降祥如種玉不  
須占夢說維魚白頭窮巷眠應穩且喜門無縣  
尹車



黃叅政入京見訪席上贈句

為操國計過留邑忽訪畸人到澗阿薇省致身  
三品貴龍江分袂十年多登朝望展匡時策駐  
馬留聽扣角歌霄漢舊知今漸少不妨霑醉別  
烟蘿

人日喜晴

此日雲開霽景鮮却看紅日滿皇川寰中百福  
人皆得勝裏千花俗舊傳已斷烽烟來故國預  
占京坻入新年竹林為報同袍侶莫對芳辰惜

酒錢

寄胡中丞

中丞控節靖江藩文武才高思獨閒上疏舊聞  
驚北虜濟時今喜出東山廣求民隱宣皇澤盡  
掃妖氛慰聖顏密勿召還知不遠旋乾長在殿  
中間

聞賊

七閩何事未休兵杪歲驚傳殺氣橫郡守不談  
龔遂策將軍虛設亞夫營髑髏徧地添新鬼烟



火無家哭野氓歲歲募軍今轉急不知鯨浪幾  
時平

老馬

龍媒蹠蹠五花齊亦是周王八駿蹄黃帕蓋鞍  
游闕下紫韉拋鞚度遼西過都能使風隨足渡  
水爭憐錦障泥老去自傷筋力盡每懷恩寵但  
長嘶

送宋鴻臚使西番

天家錫命過恒河近侍宣恩出禁坡白下偶成

今雨會蜀中淫淫見使星過行窮中土冠裳少望  
入西天舍利多預想還朝詢異域豈徒形勝說  
岷峨

六十初度自述四首用舊韻

甲子初周父器官鄉園來往布袍寬朝衣豈悞  
陶弘景木榻能容管幼安却老有方思鍊藥逢  
時無補愧彈冠家人莫咲囊如磬明月清風滿  
釣竿

逼人歲月太難禁何物能除雪滿簪朽質已同



溝壑斷生年多負海中金遺書隔世藏韋篋新  
筍經冬出孟林嘆息高堂人漸遠却看孤矢痛  
逾深

溶溶春酒浮杯綠片片林花撲座輕稚子都無  
瓊樹色老妻真有鹿門情久辭朝市逢迎嬾自  
入烟霞夢寐清巖下種松今十丈白頭堪結歲  
寒盟

把釣手非經世手賣文錢作買花錢亦知躍馬  
無竒骨自信冷霞有夙緣宰相改絃回泰道將

軍提劔掃蠻烟天家卜世元無極漢甕下休驚吏  
部眠

康宗伯致政歸以閩警且甜心武林

鄉園見說尚兵戈此去明農意若何太傅幾時  
辭別墅堯夫隨處置行窩湖中泛月搖詩筆天  
外占星望凱歌亂定還山知送日却驚郊壘向  
來多

雜興十首用羅贊善韻贊善所談者道余  
不過流連光景而已趣各不同或者上



民日報 卷七  
下一理乎觀者索之言外可也

住世誰看石化牛寄生真夢蝶爲周因游淮水  
留孤艇爲看鍾山結小樓舊牘堆床魚亂走新  
笏入盞蟻先浮杜陵不識吟詩趣苦思何緣老  
未休

自咲灰心久不然看雲長坐碧山前三花有艷  
皆珍木一室無營即洞天久別酒徒尊不舉未  
逢高士榻空懸終南亦是逃名地只恐盧生卧  
未堅

勇退元輸靖節先歸休聊免俗塵牽冥鴻避弋  
翱翔起野鳥忘機自在眠留得滄洲欣道在收  
回奔馬覺神全窮經未達盈虛理何用羲文紙  
上傳

谷口無勞慕子真白門我亦種瓜人貧因好客  
常賒酒老爲祈年每賽神獨喜葵陰能衛足翻  
嗟象齒竟焚身秋禾夏麥謀生好歲歲欣嘗兩  
度新

爲謝山靈莫獻嘲年來泉石許論交開軒不剪



藤蕪草上樹能窺鳥鵲巢竹塢有風門不閉茶  
鐺無火石頻敲閑中亦有關心處藥裹書籤兩  
未拋

向來凜雪奉官箴留得清風直到今改過朝衫  
成野服引將泉溜淨煩襟至人無夢神先定太  
上忘言思最深莫咲子牟還戀闕由來芹曝是  
丹心

多病能令咲口艱常時晏起到晨餐偶逢客送  
彫胡米恰喜厨供苜蓿盤擺脫金緋歸後樂飛  
升霄漢古來難莫嫌矮屋惟容膝若比高車此  
較安

千章灌木翠陰齊茂樹偏宜倦鳥棲蒙叟久知  
形是委太常休咲醉如泥河通渭水堪垂釣地  
近尸鄉好祝鷄洗盡鉛華留面目依然明鏡對  
菩提

靜裏渾將歲月忘澄神端坐竹方牀濟時已負  
廷三策筭老俄驚杖一鄉寸管窺天形太狹北  
轅之越路空長玄談綺語知無補不及潛心道



民日報  
德章

金魚換酒少年曾白髮  
趨朝老不能絃上松聲  
時自響匣中霜氣  
晝常疑未逢紫府修真客  
幸遇蓮臺悟道僧  
看破雕龍真小技  
虛名何用世人稱

寄張月鹿次韻

一自逃名卧翠微  
故人誰問芰荷衣  
忽傳鴻鴈天邊至  
早見雲霞紙上飛  
栢府冠裳今不賤  
西湖歌舞近應非  
知君公暇搖詩筆  
到處峰巒巒靜

可依

金白嶼壽詩

青蒼隨處寄幽襟  
花月從來助賞心  
無數新聲傳樂府  
等閑高倡動詞林  
仙人得道仍飡玉  
達士傳家不聚金  
見說鳳雛啣詔近  
莫將荷芰勝冠簪

十一月望日諸老載酒過訪奉謝

耆年擁塞卧江城  
不是栖巖學避名  
豈謂廟廊尋舊侶  
共來林壑駐高旌  
樽携法酒千杯綠  
星



聚茅堂八座明所望調元聯珮上山中長見泰  
階平

贈內

結襦獨記少年時轉眼今看白髮齊老去真成  
鹿門侶醉來曾咲太常妻棊紙局閑頻畫艇  
泛魚波晚共携却恠燈前詢割肉不知名姓隔

金閨

答董子元見懷用舊韻

自公分袂掩茅堂欲渡迷津未有梁千里音書

昨忽至百年交意晚逾長山中見月情無限菊  
畔題詩夢未忘才是廣川終對策豈容雪案老  
孫康

送李子達乞假還豐城

仙郎乞假別金扉畫舫衝寒到舊畿欲向靈岩  
尋藥草先從樞省拜庭闈名山見抱連城出新  
府看乘駟馬歸蚤起濟時還接武豈徒朋侶借  
光輝

送姚鳳麓守大名



詔簡才賢守大邦仙郎三十縮金章江邊車馬  
辭留邑道上風雲接冀方康樂之官兼翰墨穎  
川爲政首農桑古來公輔徵良吏青鬢看君上  
廟廊

肖泉公見過贈詩次韻

山中久結赤松盟闕下曾隨玉珮行往事浮雲  
多變幻故人青眼獨分明宅非揚子談經處地  
是吳王鑄劍城屢枉朱輪題翠壁豈徒窮達見  
交情

職官

送陳守禮入京

少年文采照青袍共說鄉閭出俊髦問字每勞  
過草閣束書今喜謁春曹干將遇薛光難掩騏  
驥逢孫價定高霄漢貴人知薦汝集賢堂上看  
揮毫

寄郝寅老

薊門傾蓋是何年往事浮雲祗自憐別後未逢  
書附鯉人來常說貌如仙頻看彩鳳天邊起定  
有丹方海上傳欲訪瓊樓問真訣凡胎應恨隔



壺天

寄蔣中丞東瀾兼懷郝老

堂開綠野傍江干  
司馬歸來樂事寬  
雪棹未能過剡曲  
魚書先喜到嚴灘  
至今白下思何武  
有日山中起謝安  
聞與仙翁常對飲  
壽星雙照水晶盤

送李斗岡守温州

青春乘傳別神州  
花下開尊喜暫留  
才子元推小司馬  
官階今是古諸侯  
彤幘入郡陽和轉  
畫

戟登山海霧收不久  
三公召良吏定遺棠樹在  
東甌

東麓亭赴王太宰約

冶城高處結仙菴  
太宰邀歡此駐驂  
坐上星辰瞻斗壁  
望中形勝盡東南  
百壺遠致長安酒  
三月猶分震澤柑  
向夕迅雷將雨至  
神龍疑是起深潭

春日赴徐少東約

勝地偏容野客過  
肯看白髮咲蹉跎  
莫言塵境



非仙境信有詩魔敵酒魔花氣每沾雲母障鶯  
聲能和雪兒歌主人見說封侯近暫以清襟寄  
綠蘿

謝白石侍郎見訪

移宦南曹別建章停車東郭訪柴桑到門肯笑  
蒼苔滿握手空慙白髮長才大燮調終有待時  
清吏隱暫何妨重尋勝地搖斑管二水三山倍  
有光

白石公以戎部諸詩見示奉謝一首

偶逢上客暫披襟遂枉瑤篇寄竹林吐鳳豈無  
楊子夢驚人元有杜陵心句成尊俎風猷壯興  
托江山藻思深獨恠郢歌傳下里誤將巴客當  
知音

答皇甫百泉

少領賢書共一鄉白頭天地共歸藏自違芝宇  
年真久欲訪龍門道且長獨咲巢由耽野壑誰  
如屈宋擅詞場報君亦有停雲賦不是瓊瑤愧  
遠將



民日報  
卷七  
次胡秋宇游牛首韻

城南靈秀浮雙闕佳士邀賓喜再過絕嶠仰攀  
通鷲嶺長江遙望接天河佛香繞樹晴偏細空  
翠沾衣晚更多昏黑上方終一到諸天元自隔  
藤蘿

春日王太宰潘少宰看花一首

臺花齊吐赤瑛盤二老同來載酒看三逕荒涼  
慚地主六曹清暇屬天官臨風展席香頻落入  
夜移燈興未闌他日黃扉懷故事定揮高詠寄

林端

送裴侍郎進表

表函頌壽出江東此去嵩呼對合宮近接夔龍  
丹陛上仰瞻虹電翠華中萬年垂拱逢虞帝四  
海平章望晉公遙想獨陳金鑑後沙堤先拜渥  
恩隆

楊水部枉駕道故席上成詩

每歌伐木嘆參商忝今宵更草堂顧我已成  
愚谷叟憐君初作水曹郎朱顏並舉年華久白



首重逢咲語長自古老成終大用莫將遲暮比  
馮唐

秋日寄朱山人

準擬涼生七月初草堂東畔訪潛夫豈知病卧  
維摩室空使神游玄武湖今日真仙聞在駕此  
時高閣定懸弧不知賦就千秋引花下同誰倒  
玉壺

寄劉白石大叅

憶陪銓鏡侍鑾輿回首天門廿載餘行僻自知

真過矣才高何事亦歸歟不妨結伴唯麋鹿常  
恠傳書缺鯉魚聞卧名園知獨樂笑看塵世意  
何如

送謝仁峰吏部

桂殿題名蚤歲同雲林回首各成翁藏真聞在  
三山宅在駕欣過一畝宮芝宇再逢增道氣鳳  
雛雙奮及秋風何當星聚還萍散握手翻疑夢  
寐中

送姚元白考績



移官纔問三山宅報政重趨五鳳城梓里斷金  
元合志霜天分袂獨關情禁庭搖珮逢仙侶賓  
館揮毫集友生計日承恩旋駟馬雪樓銀甕好  
同傾

初春游高座寺陪諸年丈

新年雪霰接風雷霽色欣從此日開選勝荷公  
張宴待追歡容我杖藜來公餘各抱探幽興寺  
古猶存說法臺舊會慈恩今幾在可能無醉掌  
中杯

登雨花臺

同上高臺眺帝州乍晴烟霧未全收微茫山色  
雲中見黯淡江光樹裏浮好對芳春遙送目莫  
談前代易生愁閉門久廢登山屐何幸今陪八  
座游

是日候肖翁不至

佳辰有約共追從獨少仙旌到佛宮祇謂陰晴  
今已定豈知離合竟難同名兼吏隱時多暇景  
屬芳菲賞未窮計日盍簪重載酒巖前春色倍



還公

題俞氏秀野園

近市爲園十畝寬  
達人避俗此盤桓  
秦淮烟月尊前映  
鍾阜晴雲掌上看  
檻外穿池春躍鯉  
院邊栽竹晝停鸞  
鄰家夜半聞歌吹  
知是留賓興未闌

澂父光祿得子佳詠見示次答

佳士生兒正妙年  
傳聞詞客頌綿綿  
駒來渥水元堪羨  
鳳出丹山自可憐  
此日歡聲應動地  
他

時健翮定冲天  
擬趨吳岳分湯餅  
奈少金錢箇箇穿



詩集

報對隔空中天謝賦吳在公易柳奈少金鑿齒

許太常歸田稿卷八目錄

七言律詩

張尚書過賞牡丹次韻

壽林尚書

答萬侍郎

紅梅卷

壽傑上人

江右諸進士宴集小堂席上成詩一首

六月二日喜二張司徒見訪

顧慕玉壽詩

八月十一日文子初

携乃郎從之過訪



孔道官壽詩

中秋小堂看月和林

尚書韻

張司徒邀登牛首同

林司空次司徒韻

再和司徒

送王太宰

送蔡考功督學閩中

答陳貞亭比部

答元白乞休志感

和林尚書韻

天壇同年會余不預

洞老詩來次韻

次白野大叅

夏日湖堤卽事次錢尚書韻

乙丑除夕

夏日宴篤軒魏國公

第

次蔡侍郎贈詩韻二

首

壽陳日者

贈朱象岡上舍

題座主鶴江翁別號

對雪答斌上人

讀嘉靖遺詔

游德恩寺贈月輝僧

壽笠江潘尚書七十

贈徐將軍

贈劉山人

答董子元次來韻二首



新亭田舍作

答朱長水

送張太學還寶應

枯木

遺珠

先慈忌辰凄然作二

首

山中偶成

送余伯祥會試

送大司馬郭似菴公

得告還鄉

壽武橙墩

壽半峰上人八十

詔下進階喜復原品

喜而有作

寄王西室

答張幼子

洲上偶成

寄吳伯恒進士

留耕堂詩為姚晉明

賦

贈施仲行

送馮海桴教授赴保定蕪訊少洲方伯

答林對山侍郎

再答見訪贈詩用蔡

侍郎韻

送王小石之遼陽太

僕

王箕泉輓詩

壽沈宜謙

贈別王敬美儀部

壽光祿顧汝由六十二首

王司馬公輓詩

倪曉峰壽詩



冬日張玄超過訪  
時張觀察偶以事至便邀同坐

庚午除夕述懷二首

送周公瑕北上  
答邢太史

答姚元白  
寄王三楚

江東門舟中留蕭子  
祭侍御飲時將赴陝

中  
贈朱東源中丞

寄薛道行  
賞牡丹作

壽陳梧岡侍郎  
贈黎伯泉

壽方吾原  
贈董希同山人

送甘均德會試  
偕孫懷寧蔡參軍飲

徐錦衣宅  
送張弢石還南海

送馮益川憲副  
送胡秋宇廣西提學

王氏新樓成詩以賀之

送方潯南  
送方舉人士忱

寄秦鳳樓  
送朱明虹考績北上

元洲張司空枉過話舊

姚園赴諸世家之約



張幼于贈詩次韻奉答

送曹貞菴尚書致仕

寄皇甫百泉

送吳子明就養時令

子水部駐節維揚

同春園賞牡丹

送江陽泉比部

送吳三峰

元兒拜官光祿志喜

二首

田中作

與天叙

送林對山侍郎進表

筠窓詩贈陳隱士

閒居自述次邢太史

韻

送彭茂才還袁州

寄張厚菴

送張滄東中丞一首

寄徐東山工部

輓王肯齋太守二首

壬申除夕

萬曆改元

答梧岡侍郎

七十自述四首用舊

韻

伏日邀鳳洲封君及

令子水部游莫愁湖時諸友並至

送朱明虹比部守重慶

送吳伯恒水部

送李平湖下第



贈狄維新

朱醉石輓詩

送何貞所兼寄懷平山後峰二殿試

寄黎瑤石

送吳伯恒水部守杭

州

送蔡世卿

寄和張鶴溪

聞卓漱甫拜官光祿

榮還不久卽入侍禁庭矣因贈一首

許太常歸田稿卷八目錄終

許太常歸田稿卷八

上元許穀仲貽著

七言律詩

張尚書過賞牡丹次韻

開到名花春欲歸  
朱闌高下闔芬菲  
敢期天上群仙至  
預恐風前一片飛  
對景肯辭今夕醉  
知音須信古來稀  
聞公更有明朝約  
擁篲還應候竹扉

壽林尚書



盛世真賢生貴族黑頭飛步接巖廊車停南省  
聲名重賦在西清藻翰香撫世卽看持玉鉉延  
年何用服金漿更誇後裔朱輪盛家系還隨國  
系長

答萬侍郎

平生直道厭浮沉琴鶴翛然返舊林偶出廟堂  
辭厚祿遂從江海寄閒心誰云南浦名堪避只  
恐東山望更深他日風雷天上起神龍難傍澤  
中吟

紅梅卷

武陵簇錦稱桃朶上苑蒸霞說杏枝何似幽花  
開艷色分明絳雪點冰姿粧成閣上疑宮女寫  
入圖中借畫師見說廣平心似鐵可能相對不  
題詩

壽傑上人

蚤著方袍入梵宮今年七十貌如童眼前城郭  
烟花滿心上菩提水月空盡日談經牛洞裏有  
時出定虎溪東更欣百歲開蓮社康樂歸來在



社中

江右諸進士宴集小堂席上成詩一首

十七年前攬轡行論文猶記接群英致身已躡  
青雲路訪舊還尋白下城鷄黍有緣成盛集山  
林無狀負交情昌時彙進須才傑望爾同題鴈  
塔名

六月二日喜張司徒見訪

上客聯輿問草亭晚天踈雨散炎蒸傳杯幸有  
蘭陵醞沉李慚無玉井冰綸閣持衡期並召金

門釋褐愧同登從來野性愁繩檢莫恠踈狂老  
更增

顧慕玉壽詩

少小聯姻今六十等閒青鬢各成翁久拋塵鞅  
知無累靜檢丹方定有功雛鳳蚤欣圍膝下壽  
星長見出雲中不知畫閣開筵處往日親知幾  
箇同

八月十一日文子初携乃郎從之過訪

天邊綵鳳將雛至山下清尊對月開空谷本宜



栖野老名家元自出英才涼秋獨愛登樓坐遠  
道誰能命駕來四世論交情不淺每於離合重  
徘徊

孔道官壽詩

亭開東麓鎖烟霞領教修真此寄家夜傍星辰  
朝洞府曉依龍虎眺京華驅邪舊貯吳王劍鍊  
氣新求葛令砂道貌如童知不老仙臺長見發  
三花

中秋小堂看月和林尚書韻

三秋涼月總堪憐皎潔無如此夜天豈有金尊  
開席上漫勞翠節駐江邊良宵取醉拋形迹上  
苑題名感歲年坐久揚輝如白晝絕勝銀燭照  
賓筵

張司徒邀登牛首同林司空次司徒韻

共眺名山續舊歡遠烟消盡地形寬上卿蕭散  
忘朱紱野老追隨岸鶡冠古樹接天飛宿露流  
雲沾袖弄朝寒不知鷲嶺開山處靈秀何如此  
地看



再和司徒

名山未到句先成此日同遊是夙盟但見雙峰  
當面起不知群從半天行望中已覺塵蹤遠坐  
處唯瞻慧日明興劇况逢賢達引白頭翻咲往  
來輕

送王太宰

九載南銓借宰衡奏功三見謁承明群公引領  
瞻台象聖主臨朝識履聲卽聽絲綸褒宿德爭  
看麟玉賜孤卿勿云名遂身堪退黃閣調元望

老成

送蔡考功督學閩中

留曹銓鏡馳聲久憲府文衡拜命新欲使七閩  
崇正學蚤欣五教屬端人激揚隨處專風紀陶  
鑄因材卽化鈞從此望隆台斗近好登廊廟布  
經綸

答陳貞亭比部

栖山每咲野情偏談藝俄逢哲匠憐我有文章  
非正法君於風雅得真傳散衙猶自尋丘壑直



省何嘗廢簡編勞贈新詩三嘆久分明清廟聽  
朱絃

答元白乞休志感

僻性非耽白玉珂罷歸渾似脫沉痾十年閉戶  
塵蹤少五畝開園野况多釀酒每收原上秫製  
衣頻剪沼中荷近聞詞客能捐珮從此中林好  
和歌

和林尚書韻

莫笑閑庭百卉稀天香猶得近緋衣山中酒味

欣初熟林下春光幸未歸尚想題名隨鴈塔漫  
勞懷舊問漁磯坐深却愛移燈處似有紅霞拂  
檻飛

天壇同年會余不預洞老詩來次韻

玄臺瑤館逼金扉秀栢長松翠可依仰睇雲霞  
通貝闕迴看龍虎抱王畿傳聞上客尋丹壑想  
見台星下紫微獨恠野人違雅躅却從高詠挹  
清輝

次白野大叅



老去惟欣酒力勝，芸窓久廢讀書燈。  
漢陰本卧忘機叟，火宅今藏入定僧。  
鳳尾草長慵不剪，烏皮几在倦堪憑。  
崑崙見說多芝圃，安得乘風上九層。

夏日湖堤卽事次錢尚書韻

法曹西拱帝王都，玄武平開萬頃湖。  
雨過山光波面落，風晴蓮朶鏡中鋪。  
沿堤不許漁人宿，隔岸時聞水鳥呼。  
爲羨上卿兼吏隱，引杯長對十洲圖。

乙丑除夕

又見辛盤列草堂，白頭一倍惜年光。  
山中策杖形骸健，闕下彈冠歲月長。  
敢謂舞衣排玉樹，獨欣舉案對糟糠。  
觀風知我林泉樂，幸免虛名入薦章。

夏日宴篤軒魏國公第

畫棟連雲暑亦涼，上公邀客敞虛堂。  
冰盤特送麒麟脯，玉盞頻傾琥珀漿。  
無數歌鍾依鳳律，許多舞隊象霓裳。  
留歡竟日猶云少，更展華筵水



石傍

次蔡侍郎贈詩韻

當年釋屩白門西，曾向天階拜紫泥。  
謬以踈庸承畫諾，愧無衡鑑贊銓題。  
江湖竄逐孤琴在，門逕歸來獨鳥啼。  
細訪向來游釣處，雲峰烟浪路全迷。

投簪盛世已多年，說到林泉興自偏。  
仙客偶逢談五戲，老僧相對問三玄。  
垂竿不爲非熊夢，買地唯求種秫田。  
爲謝上卿懷舊侶，寄詩長到水雲邊。

雲邊

壽陳日者

問卜人來畫捲簾，百文剛滿卽高眠。  
非關季主談皆驗，自是虛中術有傳。  
曉爇名香朝鬼谷，夜傾醇酒養元田。  
看君忠信宜延壽，未必長生盡在天。

贈朱象岡上舍

傾蓋柴門若故知，留尊花塢似前期。  
揮毫舊慕金聲賦，入座今看玉樹姿。  
野壑自憐垂釣久，詞



壇翻恠盍簪遲明朝莫放扁舟去好上秋山共  
賦詩

題座主鶴江翁別號圖

宗伯乘雲入紫微展圖猶似奉音徽寰中無復  
甘霖望江上空餘白鶴飛一代文章真可紀千  
年華表想來歸獨憐別後歌梁木潦倒彭宣舊  
業非

對雪答斌上人

正欣淑氣入殘年忽報飛霏暗九川獨有梅花

仍戀臘不應柳絮蚤漫天洛陽孤客門常閉東  
郭先生履欲穿枯坐向宵心轉寂將尋雪竇問  
三禪

讀嘉靖遺詔

玄德臨朝四紀長九天龍去罷垂裳玉皇元住  
三清界羽士空求不老方大禮蚤成瞻聖孝萬  
幾獨斷仰乾剛升遐更布輪臺詔感涕應知動  
八荒

游德恩寺贈月輝僧



長干東去隱空門松檜縈迂一逕深亭聳直疑  
登上界池開端可淨煩襟到來車馬欣乘興看  
去雲霞總會心坐久忽瞻鍾阜月輝光已映給  
孤林

壽笠江潘尚書七十

蘭臺總憲聲名舊蓬海藏真譽望高雲裏一星  
朝紫極林間雙鶴映緋袍駐顏自愛食瓊蕊接  
武頻看起鳳毛帝念老成方側席未容黃髮卧  
江臯

贈徐將軍

自昔元戎推矍鑠功名五十豈云遲已從黃石  
攻三略肯向鴻門讓一卮行縈不妨讒屢至窮  
堅須信志難移他年拊髀思良將勒石燕然是  
所期

贈劉山人

嶺南詞客愛探幽宇內真成汗漫遊就養此時  
過畫省裹糧何歲出羅浮良朋每向吟邊聚勝  
覽都從筆底收他日還鄉談絕槩知君先說帝



王州

答董子元次來韻二首

別久懷人思不禁  
高標時向夢中尋  
傳書忽報登耆壽  
習靜懸知長道心  
垂釣想臨滄海曲  
著書應卧石堂深  
燈前細讀琅玕句  
信有光騰翰墨林

芸窓莫笑老儒生  
健思飛騰彩筆輕  
策杖九峰雲氣紫  
濯纓三泖夕流清  
案頭字寫鍾王帖  
海內詩傳李杜名  
聞說漢廷徵博士  
寒松休結萬

年盟

新亭田舍作

二頃平田元負郭  
一池活水恰當門  
天晴山色來虛牖  
日午鷄聲滿近村  
玩世敢云輕爵祿  
謀生先喜足饔飧  
頻過但話桑麻業  
時與隣翁對舉尊

答朱長水

柴桑穩卧學陶公  
門逕曾無俗客通  
一自停車瞻令範  
至今揮麈憶高風  
驚心節序秋霜後  
極



目山川暮靄中只喜遠書邊  
易達今朝江上有來鴻

送張太學還寶應

芳年文采照青衫喜見停車到碧巖  
春暖橋門看鼓篋雪晴江路送歸帆  
久知孝友齊張仲不獨風流似阮咸  
驤首雲階還計日行空天馬定非凡

枯木

烈日嚴霜苦見摧遂令高幹等枯荻  
將成蒙叟

溝中斷不作西京殿上材繞樹任教行  
蟻上栖枝猶見衆禽來細看根抵藏生  
意只恐榮華指日回

遺珠

合浦連城不見收偶然遺在海東頭  
未聞象罔行間得誰解驪龍領下求  
明月不須誇照乘珊瑚何日上垂旒  
只今魚目能相混道上逢人莫暗投

先慈忌辰凄然作二首



高堂不奉彩衣歡無路從容再問安花下板輿  
春寂寂雲中鶴駕路漫漫曾憂市虎勞投杼爲  
看冥鴻喜挂冠苦志少年懷訓育燈前親爲製  
熊丸

九十慈親壽正長翟冠曾拜紫鸞章天門就養  
朱顏喜梓里承歡鶴髮康獻壽公卿常滿座舞  
衣孫子漸成行如何一夢雲霄隔聲歎無聞但  
渺茫

山中偶成

脫迹常思論養生年過六十道無成天邊日月  
心猶繫世上風波夢不驚但以薄田供伏臘嬾  
將漫刺謁公卿相逢爲謝觀風使薦牘無勞及  
姓名

送余伯祥會試

曉携珠劍出江城滿目青雲接帝京  
發憤元推廣川客獻書今見洛陽生長途雪霽勞驅馬上  
苑花繁好聽鶯老我望君還濟世莫將溫飽負  
昇平



送大司馬郭似菴公得告還鄉

喜徵耆宿上朝端何事辭榮又乞還  
參贊未酬新勅紙歸休仍閉舊松關  
竟忘雄略堪經世漫說金丹好駐顏  
宇內安危占出處可能高卧向東山

壽武橙墩

豸冠未試卽投簪歸卧南山歲已深  
養壽獨餐囊裏玉濟人常散橐中金  
林間種橘延清景谷口看雲托素心  
群鳳冲霄門閤好百年詩酒任

開襟

壽半峰上人八十

霜眉清淨絕塵緣住世今經八十年  
妙悟聞從玄覽得新詩疑自惠休傳  
宰官枉駕因聽法學士登堂爲問禪  
壽域初開正無量峰頭長看月輪圓

詔下進階喜復原品喜而有作

建儲恩詔下明堂林壑加官荷寵光  
枯木陡沾新雨露孔鸞重試舊衣裳  
居家敢望追朝列



帶翻疑佐奉常垂老遭逢難報稱但歌萬壽頌  
吾皇

寄王西室

神龍久卧本非宜召起東山亦不遲才子喜逢  
連茹日達人應廢考槃詩綵毫自昔稱宗匠濟  
廟於今望羽儀同榜別離驚歲久到來先喜慰  
相思

答張幼于

每把璫枝想今顏寒江欣見鯉書傳卽看製作

追周雅信有風流比晉賢別去未傾彭澤酒興  
來思泛剡溪舡久知伯仲鸞皇羽計日飛騰各  
妙年

洲上偶成

水國生涯十頃餘茅齋不是孔明廬飛來雲氣  
連平野看去江光接太虛筭老祗爲謀食計避  
人欲著絕交書滄洲卧穩皆君賜休咲高懸廣  
德車

寄吳伯恒進士



青年獻賦動明光回首題橋志已償龍虎榜中  
標甲第芙蓉闕下集冠裳夜移紫禁聽綸綍晝  
坐清曹說典章自古策勲須少壯看君飛步上  
巖廊

留耕堂詩爲姚晉明賦

積金只恐累兒孫留得良田傍海村沃壤傳來  
無瘠土嘉禾不生處有靈根滿堂畚鍤皆生計幾  
卷農書總要言龐氏遺安元在此因君重見古  
風存

贈施仲行

放舟震澤是何年往事重談各惘然栗里敢稱  
陶令隱竹林元愛仲容賢通家聚首春生座未  
夜啣杯月在天壯志未消終奮起肯從湖上抱  
珠眠

送馮海樾教授赴保定兼訊少洲方伯

伯仲論交歲已賒又從叔季叙通家到來每贈  
囊中錦別去聊停谷口車霄漢羨君聯羽翼山  
林容我伴烟霞還鄉使節知相遇好坐鷓原味



棣華

答林對山侍郎

寂寂茅堂隔市譁  
翩翩垂柳映階斜  
九霄忽枉高賢駕  
三徑慚非處士家  
入座談詩飛玉屑  
當筵送酒泛椒花  
到來若問幽栖事  
麋鹿群中度歲華

再答見訪贈詩用蔡侍郎韻

細雨和風換歲年  
停車勞訪灤西偏  
步兵嗜酒真成癖  
康樂吟詩妙入玄  
黃閣正求調鼎手  
青

門甘老種瓜田  
暫是游南省知多暇  
肯惜留題水石邊

送王小石之遼陽太僕

森森羽戟映朝暉  
遠向遼陽別舊畿  
官拜罔卿金作誥  
權兼漢使豸爲衣  
烽烟夜息胡塵遠  
首菊春晴塞馬肥  
預想承恩還接武  
名家龍鳳似君稀

王箕泉輓詩

乍解金章返澗阿  
白駒蚤向夢中過  
門前誰種



先生柳池上空留道士鵝雙闕聯鑣看王氣六  
橋同舫聽吳歌詩筒尚在交期盡東望孤山感  
慨多

壽沈宜謙

胷中元自有滄洲筆下烟雲到處留玩世舊披  
居士服移家新住帝王州教成今子非凡羽養  
就遐齡尚黑頭自古仙人游八極望鄉何必更  
登樓

贈別王敬美儀部

名家伯仲擅人文昨日經過見次君舊誦大篇  
真戛玉今看高槩欲凌雲山中濁酒思同把江  
上流萍惜易分此去天門瞻漸遠可無佳句贈  
鷗群

壽光祿顧汝由六十二首

聞辭玉署返滄江六十行年鬢未霜樓閣重看  
吳苑樹衣冠遙帶漢宮香墳麓度曲天倫好麟  
鳳承歡世系長往日通家吾獨老思君欲問駐  
顏方



瓊枝玉樹一仙人廿載揮毫作近臣內殿只應  
依日月故山何事憶松筠金緋自昔承皇寵雲  
水從今養性真海上端居懷往事豈無清夢到  
楓宸

王司馬公輓詩

司馬平胡志未酬前軍俄報大星流敢從天上  
辭嚴譴空使寰中仰壯猷離照再逢新日月湛  
恩還被舊松楸鳳麟瑞世留餘在想見逍遙白  
玉樓

名家伯仲擅人文昨日經過見次君舊誦大篇  
真戛玉今看高槩欲凌雲山中濁酒思同把江  
上流萍惜易分此去天門瞻漸遠可無佳句贈  
鷗群

壽光祿顧汝由六十二首

聞辭玉署返滄江六十行年鬢未霜樓閣重看  
吳苑樹衣冠遙帶漢宮香墳笮度曲天倫好麟  
鳳承歡世系長往日通家吾獨老思君欲問駐  
顏方



瓊枝玉樹一仙人廿載揮毫作近臣內殿只應  
依日月故山何事憶松筠金緋自昔承皇寵雲  
水從今養性真海上端居懷往事豈無清夢到  
楓宸

王司馬公輓詩

司馬平胡志未酬前軍俄報大星流敢從天上  
辭嚴譴空使寰中仰壯猷離照再逢新日月湛  
恩還被舊松楸鳳麟瑞世留餘在想見逍遙白  
玉樓

倪曉峰壽詩

江南累世托芳鄰修善如君信吉人陸海崢嶸  
恢舊業洞天清曠著閒身眼看彩鳳將鳴世坐  
對蒼松自養真見說開筵稱壽處曉來峰上瑞  
雲新

冬日張玄超過訪

故人分袂已多年往事重談祇自憐宵夢每過  
雲海上雪舟今到剡溪前題詩贈我揮斑管煮  
茗留君汲澗泉借問機心消盡否莫教驚動白



鷗眠

東日喜歐博士見過時張觀察偶以事至  
便邀同坐

江鄉歲晚駐征輪草閣飛來雪片新林下獨栖  
憐野客座中雙美見才人懷鉛提槧情元合炊  
黍亨藜意總真同是別離君更速可能無醉甕  
頭春

庚午除夕述懷二首

一從辛亥賦歸田轉眼流光二十年有幸金杯

常在手無端華髮亂垂肩才非用世宜先退藥  
可還童亦浪傳歲歲長安碁局變青蒼何似舊

山川

憶昔歸山買薄田漫資禾黍度流年敢云霄漢  
曾驥首只喜風塵蚤息肩酒飲三升還易醉詩  
成四韻不堪傳莫言衰暮非強壯今古光陰總

逝川

送周公瑕北上

公車迢遞入神京近侍傳聞薦長卿去路官河



初躍鯉到時宮柳正遷鶯栖遲蚤閉三江宅著  
作遙依五鳳城聖主好文今遇合誰云鉛槧負  
平生

答邢太史

今日扶犁各在田追思待漏已多年人如王貢  
曾聯珮才愧曹劉敢並肩一甲姓名天上注萬  
言康濟域中傳如何袖却經綸手翻遣神龍卧  
一川

答姚元白

勇退歸耕谷口田耆年強健似英年溪邊酒舫  
裁蓮葉坐上吟毫拔兔肩曾識干將知博物偶  
談火棗得真傳白頭隣近慚無狀獨喜垂綸共  
一川

寄王三楚

聞辭玉署到花封堂上橫琴一鶴從才子文章  
能飾吏野人刀劍盡歸農停車暫許留三善搖  
珮還看上九重一自到門題鳳去幾看飛鳥憶  
仙踪



江東門舟中留蕭子發侍御飲時將赴陝  
中

江上欣逢玉節留邀歡同泛木蘭舟霜威近座  
渾忘暑驄馬臨邊正及秋巡部卽看搖華嶽懷  
人何意到滄洲懸知康濟歸能事蚤羨澄清愜  
壯游

贈朱東源中丞

保障東南借老成璽書親捧下留京久知仁政  
非苛政蚤喜蒼生得更生惠洽閭閻先止訟威

行江海定銷兵白頭高卧從今穩日向甘棠聽  
頌聲

寄薛道行

清朝近侍說鴻臚喜爾彈冠在帝都萬燭光中  
分鷺序五雲深處學嵩呼向來豹隱知高士此  
去雄飛見丈夫回首莫思烏鵲鎮漁竿空老舊  
朋徒

賞牡丹作

國色天香奔作堆枝枝都向草堂開山中淑景



逢三月洛下奇英聚一臺照夜不妨還秉燭典  
衣何惜共啣杯預愁落去春同盡未許醒醒跨  
馬迴

壽陳梧岡侍郎

暫辭槐鼎出金扉閒坐名園錦繡園才子重刪  
潘岳賦上卿還着老萊衣東方桃顆筵前送阿  
閣鵷雛日下飛春酒壽親仍自壽人間完福似  
君稀

贈黎伯泉

伯仲才高君不忝並稱珠樹信非虛來從燕市  
遙乘舸歸向羅浮且閉廬裘敝未須嗟季子賦  
成終擬薦相如神交不爲懷同調空谷誰傳尺  
素書

壽方吾原

暫抱球琳入上都遂將冠冕卧東湖何當別後  
思高士近喜書來慰老夫共道長年遠孺色遙  
知真境卽蓬壺雲霄勲業歸雙鳳一咲乾坤萬  
慮無



贈董希同山人

習靜多年愛著書紅塵不上薜蘿居  
經疑堪補胡安國家學元承董仲舒  
問道雲間曾負笈采真白下暫停車  
山林皓首非同調欲報玄言愧不如

送甘均德會試

從來文譽似元方先後掄才果擅場  
伯樂敢云知駮耳張華元自識干將  
綵毫獻賦趨長樂雪案窮經別豫章  
二宋在前看接武古今科第總

輝光

偕孫懷寧蔡參軍飲徐錦衣宅

誰如貴介有文章邂逅留賓錦席張  
上客叨陪孫武子故人欣接蔡中郎  
芳醲迭出雕盤上鼓吹齊喧玉樹傍  
不是邀歡覓同志肯容迂叟亦升堂

送張義石還南海

青袍蕭散一童隨綵筆風流任所之  
我愛詩篇如李賀人言圖畫似王維  
論文獨喜停車久戀



別何妨解纜遲歸到羅浮冬已暮梅花應發向  
南枝

送馮益川憲副

掄魁春榜慕才雄經國文章賈誼同喜訪舊游  
過白下看啣新命向雲中澄清特許重持節談  
笑懸知好禦戎不久均勞還秉軸只今朝野望  
俱隆

送胡秋宇廣西提學

詞臣何歲出金閨造士新看拜紫泥使節將離

淮水曲文星已照建陵西英才想見思陶鑄朋  
舊能無惜解携回首上林還只尺只今全樹待  
君栖

王氏新樓成詩以賀之

高樓結就俯江城畫棟巍峩逼太清盡日波濤  
喧几席中宵星斗挂簷楹熊羆蚤入斯干詠輪  
奐元知肯構情歲歲奉親開壽宴八窓雲映彩  
衣明

送方潯南



向來藝苑久推君此日經過慰所聞  
望去眉間多道氣摹來石上總高文  
登臺眺迥沾花雨入寺談空對白雲  
幾欲相從問真偈紅塵應恨未離群

送方舉人士忱

獨有通家念野人每從壁水過雲林  
縱橫元愛文章好離合翻驚歲月深  
共道英雄將釋褐不妨鷄黍暫披襟  
還鄉朋舊如相問爲說忘機似漢陰

寄秦鳳樓

水部南來喜識荆舊從烏府仰高名  
蓬門車馬勞頻駐金谷尊壘許共傾  
鼎味豈能調衆口荷衣從此遂幽情  
海邊閉閣揮毫坐想見閒居賦已成

送朱明虹考績北上

畫省仙郎喜益簪公餘騎馬數相尋  
三年陰德留刑署五色英詞擅藝林  
霜節揚旌初報政草堂醜酒倏分襟  
行看獻納還霄漢肯負平生向



日心

元洲張司空話舊

上卿停蓋問愚溪曾是看花並馬蹄  
顧我朽唯溝斷似羨公才與棟隆  
齊交臨晚歲情逾密話到當年意總迷  
不是太常能縱飲早時薰德醉如泥

姚園赴諸世家之約

芙蓉閣上錦筵鋪公暇邀賓及野夫  
十畝芳園藏近市一時仙吏集陪都  
穿林絡繹來珍饌接

坐縱橫送玉壺取醉竟忘霜月落却尋歸路總  
糝糊

張幼于贈詩次韻奉答

清時未敢薄功名自是平生怯送迎  
別後入山全野性到來停蓋見交情  
蛟龍暫卧長洲苑松菊何孤白下城  
對酒不須憂世事只今關塞已銷兵

送曹貞菴尚書致仕

寰中盡仰老司空爲國從來抱朴忠  
忽上一封



過闕下遂辭八座出江東賜歸且覓延年藥召  
起終收濟世功尚想杏園曾附驥白頭分快意  
無窮

寄皇甫百泉

相看七十明年是憶昔攀龍髯各青廊廟未論  
弘遠業山林唯喜得修齡久知驚代傳詞賦近  
報栖巖養性靈莫訝同庚君獨健文星元是老  
人星

送吳子明就養時令子水部駐節維揚

伯子名高水部郎迎親今去駐維揚流鶯語燕  
隨官舫竹筍江魚薦壽觴北望波濤通上國南  
瞻雲樹接家鄉知君別後馳封近來往天門晝  
景長

同春園賞牡丹

爲賞名花列綺筵萬花如錦各爭妍分從西洛  
枝柯異裁向王門雨露偏入夜故宜銀燭照臨  
風寧厭羽杯傳高情橋梓能留客對景渾忘皓  
首年



送江陽泉比部

名家舊仰出群材留省欣逢結綬來在昔雄文  
傳上國只今淑問滿秋臺論交獨喜綈袍在報  
政俄驚畫鷁催此去天門求世德肯教仙吏下  
蓬萊

送吳三峰

延陵才子舊知名避地相尋喜復驚纔向座中  
瞻玉樹遂從賦裏聽金聲書空此日同殷浩題  
柱當年似馬卿此去故人霄漢在肯令飄泊負

平生

元兒拜官光祿志喜二首

北來昨見八行書知爾彈冠出禁廬粟爵昔年  
曾卜式貲郎今日又相如莫談黃榜傳科第且  
喜烏紗奉起居不久阿兄還結綬恩光雙映舊  
門閭

霄漢傳聞捧檄歸白頭歡動釣魚磯山中舊傍  
青龍卧衣上今看練鵲飛盛世未須輕墨綬大  
庖况乃逼金扉致身總在駕行裏莫道題橋願



歸田稿 卷八  
已違

田中作

郭外平田接鳳臺，岍邊五柳是新栽。  
曲池魴鯉時潛躍，隔嶺羊牛晚下來。  
楫拙煨成香滿屋，茅柴釀就綠盈杯。  
頻年多獲輸官蚤，獨喜門無縣吏催。

與天叙

乘龍遠踏帝京塵，暫向東山別老身。  
萬里萍踪初作客，百年桃葉好宜人。  
三星看去天應近，雙

鳳歸來菊正新，預想重闈開宴喜。  
不妨顛倒着綸巾。

送林對山侍郎進表

瑤函頌壽五雲中，班接夔龍拜舞同。  
赤鳥重登文石陛，衮衣新御大明宮。  
錄裁金鑑忠誰並，制草黃麻譽夙隆。  
調鼎卽今求世德，豈容真宰駐江東。

筠窓詩贈陳隱士

蒼筠手種是何年，陰覆軒窓暑亦寒。  
出戶不求



民日報  
卷八  
筇作杖入林惟取籜爲冠簷前瀟灑無塵土枝  
上飛騰有鳳鸞好對金風傾竹葉百年常聽珮  
珊珊

閒居自述次邢太史韻

叨列清班憶昔年出游江海豈無緣曾攀滕閣  
搖斑管幾傍蘇堤曳畫舫偃蹇本非槐鼎相沉  
酣將比竹林賢寰中小大生來定雀自卑飛鳳  
自騫

送彭茂才還袁州

乘雲太史罷談玄訪舊欣逢季子賢標格想從  
鈐嶺得文章知是玉堂傳通家會面憐今夕往  
事驚心憶昔年接武望君情不淺行看雕鶚在  
秋天

寄張厚菴

去年秋杪送君行今見秋風歲又更別後好藏  
三尺在人來頻道萬言成山林栖息慚迂叟霄  
漢飛騰看友生吟就新詩付雙鯉江天東望不  
勝情



送張許東中丞一首

坐今天塹靜烟烽移鎮名藩節制雄遙奉璽書  
來闕下獨持繡斧出江東惠沾列郡歌謠作威  
振夷方貢獻通暫借全才收偉績調元還上大  
明宮

寄徐東山工部

龍虎山高信未通傳聞大耋貌如童林泉久謝  
金緋寵郡縣猶歌保障功阿閣即今巢乳鳳後  
車從此應非熊爲欣茵鼎逍遙地迎壽迎恩兩

不窮

輓王肯齋太守二首

青鬢論交皓首臨乾坤轉眼歲華深祗愁別後  
雙魚斷豈料秋來二豎侵夜壑竟移王子棹高  
山誰聽伯牙琴延陵有劔何年掛東望天台淚  
滿襟

京兆聲名何武同至今祠宇在江東諸生老去  
懷師範太守從來有父風久羨食霞樓石竇近  
聞騎鶴返崆峒承家群鳳翩翩起誰道人間萬



事空

壬申除夕

臘半逢春氣不寒  
歲除張宴夜將殘  
文通搖筆才殊退  
子美啣杯興未闌  
真樂早從閒處得  
浮名元向夢中看  
流年七十明朝是  
肯坐重闈不醉歡

萬曆改元

紀元萬曆此開先  
英主乘龍正御天  
大地陽回風漸轉  
長空雲散日高懸  
此時瑞氣彌寰宇  
何

處新聲入管絃  
自幸稀齡還矍鑠  
從今擊壤樂堯年

答梧岡侍郎

余年七十翁  
加二蒲質松姿  
愧不同每指青雲  
懷附驥忽瞻碧漢  
見來鴻斷金高義  
寰區外戛玉新篇  
咳唾中預想功成  
還入道定分仙藥  
寄江東

七十自述四首用舊韻

頃刻年華七袞臨  
喜於中歲早投簪  
薄田近郭



民日報 卷八  
饒栽秫舊帙盈箱勝積金獵得虛名慚甲第養  
成野性愛山林糟糠無恙斑斕滿肯厭玻璃送  
酒深

不向天門領百官歸來高卧五湖寬雲霄勲業  
三台遠土木形骸一榻安每剪池荷成野服頻  
收林籜製新冠何言致仕須今歲不把朝衣換  
釣竿

國中七十杖而行老我翻憐步屨輕縱酒不殊  
當日興惜花猶是少年情書通政府心元嬾身

在溪山夢自清更喜交游多墨客頻來詩社結  
新盟

艾年解綬又稀年風月嘲吟不費錢學道未能  
談五戲觀空已是斷三緣藥欄入夏鋪紅錦柳  
塢藏春擁翠烟姻婭過逢惟痛飲醉來還向北  
窓眠

伏日邀鳳洲封君及令子水部游莫愁湖  
時諸友並至

盧家女子今何在城下風流尚此湖乘傳偶逢



賢父子盪舟兼集舊朋徒堤邊白鷺千群集水  
面紅蓮十里鋪盡日啣杯忘溽暑只疑身世入  
蓬壺

送朱明虹比部守重慶

久游憲部蜚清譽新拜專城愜壯心來往詞林  
聽夏玉飛騰雲路看橫金行經巫峽才逾健坐  
對岷江澤共深從此登台瞻漸遠幾時重和白  
頭吟

送吳伯恒水部

南游小試濟川才將父欣乘駟馬回應召卽登  
玄武署盍簪聊憇法王臺奏功定自含香入戀  
別能無載酒來英主臨朝方好少看君青鬢躡  
三台

送李平湖下第

何事秋風又解維中年猶自未逢時江邊惆悵  
人千里座上留連酒一卮相馬幾曾無伯樂知  
音畢竟有鍾期古來大器成多晚未許英雄嘆  
數奇



贈狄維新

當年覽勝出金陵東野堂中看日升  
鷄黍豈能忘夙昔弓裘今喜見孫曾  
慚予枕石非龍卧望爾昂霄比鳳騰  
莫對清尊談往事風波無限思難勝

朱醉石輓詩

曾從海上見才人落筆珠璣信有神  
正喜詞壇能得侶豈知夜壑遂藏真  
花間聽曲音猶在石上傳杯迹已陳  
大雅卽今誰繼響臨風休恠涕

沾巾

送何貞所兼寄懷平山後峯二殿試

名家玉樹照人清獻藝歸來問冶城  
紅藥堦前傾濁酒綠楊堤上駐仙旌  
一丘獨喜藏迂叟二仲翻勞念友生  
雙鳳將雛終並起白頭瞻望不勝情

寄黎瑤石

曾從嶺海見詩仙一隔徽音又八年  
南省談兵兼吏隱西清染翰借才賢  
獨慙棄置頻中聖莫



笑踈慵廢草玄懷我近聞裁妙句不知鴻鴈幾  
時傳

送吳伯恒水部守杭州

水部才名久出群妙齡早拜列侯尊雙旌暫下  
朝元閣五馬新辭建禮門郡對湖山仙境是坐  
携琴鶴古風存漢家公輔徵循吏計日還承簡  
在恩

送蔡世卿

尚書孫子擅詞場來往秦淮歲月長昔着綵衣

趨幕府今隨皂蓋過遐方探竒定自搖詩筆退  
食還應獻壽觴柳色正濃斑馬去留君不住思  
茫茫

寄和張鶴溪

稚兒移宦傍家園豈料陳情動九天遂有同官  
存雅道却當岐路贈高篇源尋白帝聞當日瓜  
種青門愧暮年冀北江南違識面神交已到五  
雲邊

聞卓徵甫拜官光祿榮還不久卽入侍禁



庭矣因贈一首

盛世彈冠屬雋髦  
羨君今已換青袍  
雲霄始識天門近  
日月親瞻御座高  
休沐故園惟待詔  
委蛇清署任揮毫  
欲攀瓊樹知何歲  
獨立風前首重搔

許太常歸田稿卷八

終

武林卓明卿澂父校



